

固安文獻志

朱益藩署檢

固安文獻志卷七目錄

耆舊事彙

唐

張刺史知謫

肥鄉賢

張侍郎知默

張刺史弟

張燕公說

上

固安文獻志卷八目錄

耆舊事彙

唐

張燕公說

中

固安文獻志卷七

天津徐世昌鑒定

縣人賈廷琳謹編

耆舊事彙

唐

張刺史知謩

新唐書張知謩本傳。張知謩字匪躬。幽州方城人。徙家岐。兄弟五人。知玄。知晦。知泰。知默。皆明經高第。曉吏治。清介有守。公卿爭爲引重。調露時。知謩監察御史裏行。知默左臺侍御史。知謩歷十一州刺史。所莅有威嚴。武后降璽書存問。萬歲通天中。自德州刺史入計。后奇其貌。詔工圖之。稱其兄弟容而才。謂之兩

絕又門皆列戟。白雀巢其廷。后數寵賜。知泰歷益州長史。中臺左丞。兵部侍郎。封陳留縣公。中宗在房州。禁察苛嚴。知謩與董玄質。崔敬嗣。繼爲刺史。供饘保戴不少弛。帝復位。拜知謩左衛將軍。加雲麾將軍。封范陽郡公。知泰御史臺大夫。加銀青光祿大夫。封漁陽郡公。伯仲華首同貴。時以爲榮。知泰忤武三思。故出爲并州刺史。天兵軍使。終魏州刺史。謚曰定。知謩歷東都副留守。左右羽林大將軍。同華州刺史。大理卿。致仕。年八十。開元時卒。知謩敏且亮。惡請謁求進士。或不才冒位。視之若仇。每敕子孫。經不明不得舉。家法可稱云。武后革命。知泰奏置東都諸關十七所。譏歛出入。百姓驚駭。樵米踊貴。卒罷不用。議者羞薄。

之知默與監察御史王守慎來俊臣周興掌詔獄數陷大臣守慎雖其甥惡鞠引之暴不得去請度爲浮屠后許之而知默卒陷酷吏子孫禁錮爲張氏羞知玄子景昇知泰子景佚開元中皆顯官

按張景佚以都水使者開元九年郭知運薨命護其葬見張燕公集

舊唐書良吏傳張知謩幽州方城人也

原作蒲州河東人依新唐書改

徙家于岐

少與兄知玄知晦弟知泰知默五人勵志讀書皆以明經擢第

儀質瓌偉眉目疏朗曉於立理清介自守故當時名公爭引薦

之遞歷畿赤知謩知泰知默調露後又歷臺省知謩天授後歷

房和舒延德定稷晉洛宣貝十一州刺史所蒞有威嚴人不敢

犯通天中知泰爲洛州司馬知默爲秋官郎中知謩自德州入

計則天重其才幹。又目其狀貌過人。命畫工寫之。以賜其本曰。人或有才。未必有貌。卿家昆弟。可謂兩絕。時人稱之。尋以知泰爲夏官地官侍郎。益州長史。中臺右丞。初知謩爲房州時。中宗以廬陵王安置房州。制約甚急。知謩與董玄質崔敬嗣相次爲刺史。皆保護供擬豐贍。中宗德之。及神龍元年。中宗踐極。自貝州追知謩爲左衛將軍。加雲麾將軍。封范陽郡公。知泰自兵部侍郎。授右御史大夫。加銀青光祿大夫。進封漁陽郡公。鬚髮華皓。同貴於朝。時望甚美之。知泰以忤武三思出爲并川刺史。天平軍使。仍帶本官。尋又爲魏州刺史。景龍二年卒。優詔褒贈。謚曰定。時知謩爲洛州長史。東都副留守。又歷左右羽林大將軍。

同華州刺史。大理卿。致仕。開元中卒。年八十。知謇敏於從政。性亮直。不喜有請託求進。無才而冒位者。故子姪經義不精。不許論舉。知默嘗與來俊臣周興等同掌詔獄。陷於酷吏。子孫禁錮。開泰開元中累贈刑部尙書。特進。知玄子景昇。知泰子景佚。開元中皆至大官。門列棨戟。

〔清徐松唐兩京城坊考〕唐左衛將軍范陽郡公張知謇宅。在東京定鼎門街東第三街。從南第一之尙賢坊。

張侍郎知默

〔舊唐書中宗紀〕神龍元年三月丁亥。廢左右司員外郎其酷吏張知默等十八人。雖已身死。竝宜除名。

又立宗紀。開元十三年三月丙申。御史大夫程行謏奏。周朝酷吏張知默等二十三人。殘害宗枝。毒陷良善。情狀尤重。子孫不許仕宦。

又徐有功傳。時酷吏周興來俊臣等構陷無辜。皆抵極法。公卿震恐。莫敢正言。有功獨存平恕。俄而鳳閣侍郎任知古。冬官尚書裴行本等七人。被構陷當死。則天謂公卿曰。古人以殺止殺。我今以恩止殺。就羣公乞知古等。錫以再生。各授以官。佇申來效。俊臣張知默等又抗表請申大法。則天不許之。俊臣乃獨引行本重驗前臯。奏曰。行本潛行悖逆。告張知蹇。按蹇與蹇通與廬陵王反不實。臯當處斬。有功駁奏。行本竟以免死。

又隱逸王守慎傳。守慎垂拱中爲監察御史。時羅織事起。守慎舅秋官侍郎張知默推詔獄。奏守慎同知其事。守慎以疾辭。因請爲僧。

張燕公說

上

舊唐書張說本傳。張說字道濟。其先范陽方城。

二字據張燕公集及張曲江集增

人。

代居河東。近又徙家河南之洛陽。弱冠應詔舉對策乙第。授太子校書。累轉右補闕。預修三教珠英。久視年。則天幸三陽宮。自夏涉秋。不時還都。說上疏諫曰。陛下屯萬乘。幸離宮。暑退涼歸。未降還旨。愚臣固陋。恐非良策。請爲陛下陳其不可。三陽宮去洛城一百六十里。有伊水之隔。陂阪之峻。過夏涉秋。水潦方積。

道壞山險。不通轉運。河廣無梁。咫尺千里。扈從兵馬。日費資給。連雨彌旬。卽難周濟。陛下太倉武庫。竝在都邑。紅粟利器。蘊若山邱。奈何去宗廟之上都。安山谷之僻處。是猶倒持劍戟。示人鋒柄。臣竊爲陛下不取。夫禍變之生。在人所忽。故曰安樂必戒。無行所悔。此不可止之理一也。宮城褊小。萬方輻湊。填城溢郭。併鋪無所。排斥居人。蓬宿草次。風雨暴至。不知底託。孤惇老病。流轉衢巷。陛下作人父母。將若之何。此不可止之理二也。池亭奇巧。誘掖上心。削巒起觀。竭流漲海。俯貫地脈。仰出雲路。易山川之氣。奪農桑之土。延木石。運斧斤。山谷連聲。春夏不輟。勸陛下作此者。豈正人邪。詩云。人亦勞止。汽可小康。此不可止之理。

三也。御苑東西二十里。所出入來往裸人甚多。外無墻垣局禁。內有榛藂谿谷。猛獸所伏。暴慝是憑。陛下往往輕行。警蹕不肅。歷蒙密乘。嶮巇卒然有逸獸狂夫。驚犯左右。豈不殆哉。雖萬全無疑。然人主之動。不宜易也。易曰。思患預防。願陛下爲萬姓持重。此不可止之理四也。今國家北有胡寇。覲邊。南有夷獠。騷徼。關西小旱。耕稼是憂。安東近平。輸漕方始。臣願陛下及時旋軫。深居上京。息人以展農。修德以來遠。罷不急之役。省無用之費。澄心澹懷。惟億萬年。蒼蒼羣生莫不幸甚。臣自度芻議。十不一從。何者。沮盤遊之娛。間林沚之玩。規遠圖而替近適。要後利而弃前歡。未沃明主之心。已戾貴臣之意。然臣血誠密奏。而不愛

死者不願負陛下言責之職耳。輕觸天威。伏地待罪。疏奏不省。長安初修三教珠英畢。遷右史內供奉。兼知考功貢舉事。擢拜鳳閣舍人。時臨臺監張易之與其弟昌宗構陷御史大夫魏元忠。稱其謀反。引說令證其事。說至御前。揚言元忠實不反。此是易之誣構耳。元忠由是免誅。說坐忤旨配流欽州。在嶺外歲餘。中宗即位。召拜兵部員外郎。累轉工部侍郎。景龍中。丁母憂去職。起復授黃門侍郎。累表固辭。言甚切至。優詔方許之。是時風教類紊。多以起復爲榮。而說固節懇辭。竟終其喪制。大爲識者所稱。服終復爲工部侍郎。俄拜兵部侍郎。加弘文館學士。睿宗即位。遷中書侍郎。兼雍州長史。景雲元年秋。譙王重福於東都。

權進而死。留守捕繫枝黨數百人。考訊結構之狀。經時不決。睿宗令說往按其獄。一宿捕獲重福。謀主張靈均。鄭愔等。盡得其情狀。自餘枉被繫禁者。一切釋放。睿宗勞之曰。知卿按此獄。不枉良善。又不漏罪人。非卿忠正。豈能如此。玄宗在東宮。說與國子司業褚无量俱爲侍讀。深見親敬。明年同中書門下平章事。監修國史。是歲二月。睿宗謂侍臣曰。有術者上言。五日內有急兵入宮。卿等爲朕備之。左右相顧莫能對。說進曰。此是讒人設計。擬搖動東宮耳。陛下若使太子監國。則君臣分定。自然窺覷路絕。災難不生。睿宗大悅。即日下制。皇太子監國。明年又制。皇太子卽帝位。俄而太平公主引蕭至忠。崔湜等爲宰相。以說爲

不附己。轉爲尙書左丞。罷知政事。仍令往東都留司。說旣知太
平等陰懷異計。乃因使獻佩刀於玄宗。請先事討之。玄宗深嘉
納焉。及至忠等伏誅。徵拜中書令。封燕國公。賜實封二百戶。其
冬改易官名。拜紫微令。自則天末年。季冬爲潑寒胡戲。中宗嘗
御樓觀之。自是因蕃夷入朝。又作此戲。說上疏諫曰。臣聞韓宣
適魯。見周禮而歎。孔子會齊。數倡優之罪。列國如此。况天朝乎。
今外蕃請和。選使朝謁。所望接以禮樂。示以兵威。雖曰戎夷不
可輕易。焉知無駒支之辯。由余之賢哉。且潑寒胡未聞典故。裸
體跣足。盛德何觀。揮水投泥。失容斯甚。法殊魯禮。藝比齊優。恐
非干羽柔遠之義。樽俎折衝之禮。自是此戲乃絕。俄而爲姚崇

所構。出爲相州刺史。仍充河北道按察使。俄又坐事左轉岳州刺史。仍停所食實封三百戶。遷右羽林將軍。兼檢校幽州都督。開元七年。檢校并州大都督府長史。兼天兵軍大使。攝御史大夫。兼修國史。仍齎史本隨軍修撰。八年秋朔方大使王晙誅河曲降虜阿布思等千餘人。時并州大同橫野等軍有九姓同羅拔曳固等部落。皆懷震懼。說率輕騎二十人。持旌節直詣其部落。宿于帳下。召酋帥以慰撫之。副使李憲以爲夷虜難信。不宜輕涉不測。馳狀以諫。說報書曰。吾肉非黃羊。必不畏喫。血非野馬。必不畏刺。士見危致命。是吾效死之秋也。於是九姓感義。其心乃安。九年四月。胡賊康待賓率衆反。據長泉縣。自稱葉護。攻

陷蘭池等六州。詔王峻率兵討之。仍令說相知經畧。時叛胡與党項連結。攻銀城連谷。以據倉糧。說統馬步萬人。出合河關掩擊。大破之。追至駱駝堰。胡及党項自相殺阻。夜胡乃西遁。入鐵建山。餘黨潰散。說召集党項。復其居業。副使史獻請因此誅党項。絕其翻動之計。說曰。先王之道。推亡固存。如盡誅之。是逆天道也。因奏置麟州。以安置党項餘燼。其年拜兵部尙書同中書門下三品。仍舊修國史。明年又敕說爲朔方軍節度大使。往巡五城。處置兵馬。時有康待賓餘黨。慶州方渠降胡康願子。自立爲可汗。舉兵反。謀掠監牧馬。西涉河出塞。說進兵討禽之。并獲其家屬於木盤山。送都斬之。其黨悉平。獲男女三千餘人。於是